

Noticia
Transparente
di Gobierno

ISLA ONLINE

Dialuna 1 Juli 2024

Email: IslaOnline@gobierno.aw Tel: 528-4952

ARTE DI MURAYA
SAN NICOLAS



Gabinete Wever-Croes




GOBIERNO DI ARUBA Y EAGLE LNG A YEGA NA PALABRACIONNAN PA YEGA NA REALISACION DI E PROYECTO MAS LIHE POSIBEL



Diabierna ultimo, Prome Minister Evelyn Wever-Croes hunto cu Minister di Energia Glenbert Croes a reuni cu ehecutivonan di Eagle LNG pa asina papia riba tur e pasonan y decisionannan cu ainda lo mester wordo tuma. Prome Minister a indica cu durante e reunion, tanto e representantenan di Eagle LNG y e director di WEB Aruba NV a indica di ta comprometi pa sigui cu e proyecto importante aki pa pais Aruba.

Tambe, Director di WEB, señor Alfredo Koolman a informa riba e importancia di e proyecto aki pa por yega na e meta cu Aruba tin di transiciona pa energia alternativo, y bay over na hydrogen. Ta importante pa menciona si, cu pa logra e transicion pa hydrogen, lo tuma su tempo, y p'esey e proyecto cu Eagle LNG ta ofrece Aruba na e momento aki, ta e miho solucion.

Prome Minister a indica cu pa Aruba e ta importante pa mantene e contract aki cu Eagle LNG, debi cu na momento cu WEB a cera e acuerdo aki cu nan, tabata prome cu e pandemia y e prijs stipula den e contract tabata uno relativamente abou, p'esey ta importante pa sigui cu e proyecto aki. E punto principal di e reunion di diabierna mainta tawata cu Gobierno di Aruba y Eagle LNG a yega na palabracionnan pa yega na realisacion di e proyecto aki mas lihe posibel. ■■■



Prome Minister Evelyn Wever-Croes: Como muestra di aprecio

PROME MINISTER A ENTREGA CERTIFICADO NA TUR E STAKEHOLDERS CU TA HACI PASANTIA PA ALUMNONAN DI EPI POSIBEL



Diabierna anochi, Prome Minister Evelyn Wever-Croes tabata presente na e entregamento di certificadonan na tur stakeholder cu ta haci pasantia (stage) na EPI posibel a traves di Plataforma Enseñansa y Labor PEL. Prome Minister a expresa cu pa su persona e tabata un honor di por tabata presente na e gran evento aki, na unda el a entrega personanan den sector publico y sector priva un certificado como aprecio pa nan cooperacion den guia e studiantenan di EPI durante nan pasantia, cu ta un parti crucial pa nan por termina nan estudio.

Prome Minister a indica cu EPI ta un instituto sumamente importante, mirando cu hunto cu EPB y OAA, nan ta prepara nan alumnonan pa subi e mercado laboral. Pero pa e alumnonan por completa nan estudio, nan lo mester pasa un pasantia na un compania cu lo yuda nan gana e experiencia necesario den e ramo cu nan ta studiando. P'esey ta importante pa reconoce y gradici tur e companianan cu a "partner" cu EPI pa haci esaki posibel, pasobra sin nan cooperacion, e alumnonan no lo por termina nan estudio exitosamente.

Un di e deseonan di Gobierno ta pa enseñansa ta mas enfoca riba e materianan di tecnologia, matematica, ciencia y ingenieria pa asina prepara e alumnonan pa e trabounan di futuro. "Mi ta felicita EPI pa e bon trabou cu nan ta bin ta haciendo pa loke ta educacion di e hobennan, y mi ta gradici tur e 'partners' pa nan sosten y apoyo den haci esaki posibel. Mi ta spera cu den futuro, EPI por logra haya mas 'partner' pa coopera cu EPI pa yuda asina e alumnonan pasa nan pasantia exitosamente", Prome Minister a expresa. ■



Prome Minister Evelyn Wever-Croes:

TELEFON PA HUBENTUD HUNTO CU PANAMERICAN DEVELOPMENT FOUNDATION A PRODUCI E PELICULA CORTICO "MY STORY"

Hobenan ta e testimonio cu diversidad no ta un obstaculo sino un fortaleza



Diabierna atardi dia 28 di juni, den un Gloria Theater completamente yen, Prome Minister Evelyn Wever-Croes a presencia e premiere di e pelicula cortico "My Story".

Telefon pa Hubentud 131, hunto cu Panamerican Development Foundation (PADF), a produci e pelicula cortico "My Story", unda hobennan di diferente nacionalidad ta comparti un dia den bida di cada un, pa cada un siña di e otro, compronde otro miho y asina fomenta mas tolerancia, respet y empatia. Tambe como parti di e proyecto di "My Story", tawatin un exposicion di obranan di arte, unda e hobennan di diferente nacionalidad a expresa nan mes di un forma conmovedor. Minister President a keda impresiona y a menciona cu a trata di obranan di arte impactante cu a refleha e sentimentonan pero tambe e talento inmenso cu ta reina bou di e hobennan.

Prome Minister, na e momento di e lansamento di e pelicula cortico "My Story" a entrega un discurso impresionante enfoca riba tolerancia y empatia;

"Mi ta sinti mi sumamente honra di por ta presente awe na e ocasion tan special aki na e premiere di "My Story." E no ta solamente un 'short film', pero tambe un muestra di e creatividad di nos hobennan y e poder di union y comprension.


Nos ta biba den un mundo cu ta yena di diversidad, cu mas di 100 nacionalidad, nos isla ta un testimonio di esey. "My Story" ta un proyecto cu ta ilumina e importancia di nos aceptacion y

respet pa otro. Nos hobennan, tanto local como internacional, a bin hunto pa siña di otro y crece hunto. Nan ta un inspiracion pa nos tur, demostrando cu no obstante di unda nos ta bin, nos por traha man den man pa un miho futuro. E hobennan aki a mostra un nivel di curashi y dedicacion cu ta un refleho di nan mayornan.

Boso a bin for di diferente parti di mundo y cultura, pero boso a descubri forsa den boso diferencianan y a skirbi un storia nobo, un historia di unidad y di amor. Boso ta un ehempel pa Aruba henter, demostrando cu nos tin e poder pa supera e diferencianan cu ta separa nos.

Nos hobennan ta un testimonio di e echo cu diversidad no ta un obstaculo, sino mas bien nos fortaleza. Mi ta sumamente agradecido na tur esnan cu a contribui na e exito di "My Story." Bo trabou ta duna nos speransa y ta un ehempel pa otro paisnan. 'Sigamos unidos, sigamos luchando por una isla donde cada persona, sin importar su origen, pueda sentirse en casa, porque Aruba es tu casa tambien'.

Mi kier recorda nos tur, cu e proyecto aki ta solamente e comienso. Nos tin hopi mas pa logra, y mi ta confia cu hunto nos lo yega leu. Hopi danki pa boso sosten y pa boso amor pa e proyecto aki. Muchas gracias a todos por su presencia y apoyo. Juntos, podemos construir un pais más inclusiva e unida'. Danki!", Prome Minister a expresa durante su discurso na e ocasion. ■■■



Prome Minister Evelyn Wever-Croes:
Hunto cu diferente hefe di estado

PROME MINISTER A ATENDE E CENA DI DESPEDIDA
DI PRESIDENTE SALIENTE DI PANAMA



Dialuna prome di juli na Panama, a tuma luga e traspaso di poder entre e Presidente saliente, señor Laurentino Cortizo y e Presidente elegi nobo, señor José Raúl Mulino. Prome Minister Evelyn Wever-Croes a presencia e traspaso aki den nomber di Reino Hulandes y di Aruba hunto cu varios otro hefe di estado.

Durante e biahe aki tambe Prome Minister lo reuni cu sector priva di Panama especialmente pa encurasha nan pa haci negoshi cu Aruba creando asina mas oportunidad pa desaroyo di nos pais.

Riba invitacion di Presidente saliente señor Cortizo diadomingo, Prome Minister, hunto cu varios hefe di estado, a atende e cena di despedida di su periodo como Presidente. Hefenan di estado presente tawata: Rey di Spaña, Presidente di Costa Rica, Presidente di Republica Dominicana, Presidente di Barbados, Minister Presidente di Aruba, Minister Presidente di Belize y Vice Presidente di El Salvador.

Durante e cena, señor Cortizo a gradici e hefenan di estado y tur presente pa e sosten y amistad. El a remarca cu e Vice Presidente di El Salvador y Prome Minister di Aruba tawata tey presente na su instalacion di Presidente di Panama 5 aña pasa. Y a vocifera su gratitud un biaha mas pa e amistad brinda y e conexion cu a keda entre e gobiernonan. El a gradici nan tambe pa nan presencia un biaha mas, pero e biaha aki na ocasion di su despedida como Presidente di Panama.

Prome Minister: “Tabata 5 aña dificil pa Panama cu e pandemia pero nan a haci un bon trabou pa saca e pais di e crisis. Aruba ta busca pa fortifica su posicion den region y no ta asina dependiente di Hulanda mas. Den e cuadro aki ta importante pa estrecha lasonan cu paisnan den region”.





NATIONAL CLIMATE RESILIENCE COUNCIL TA TENE SU PROME REUNION



Diabierna siman pasa a tuma luga e prome reunion oficial di e National Climate Resilience Council (NCRC) unda cu a tuma pasonan importante pa e futuro di nos isla su lucha contra e efectonan di cambio climatico.

Miembronan di NCRC, stakeholders y ministernan cu a haci di e actividad aki un miniterraad extraordinario p'afo di bestuurskantoor, a reuni henter mainta na La Cabana Beach Resort. E enfoke principal di e encuentro tabata pa presenta e timeline cu NCRC lo sigui y inicia e estudio di CORVI (Climate and Ocean Risk Vulnerability Index) di Stimson Center. Pues a conta cu presencia di dos experto cu ta lidera e CORVI, directora di e programa di seguridad ambiental di Stimson Center, Sally Yozell y economista y ambientalista Tracy Rouleau. Nan a elabora ariba e tecnicidadnan di e estudio y contesta diferente pregunta cu a bin dilanti.

E CORVI ta un herment fundamental den Aruba su adaptacion pa cu cambio climatico. E ta consisti di un serie di indicadornan

cu ta yuda nos compronde con cambio climatico ta impacta cierto areana urbano for di un perspectiva ambiental, economico y social. Esaki lo percura pa por crea manejo basa ariba data y informacion di calidad halto.

Resiliencia pa cu cambio climatico ta fundamental pa cu nos sobrevivencia. Aruba ta un di e paisnan mas caluroso di mundo posiciona number 8 ariba un lista di 2022 di e paisnan cu e averahe di temperatura mas halto globalmente.

E reunion cu a mira participacion activo di tur skina, incluyendo di nos prome y demas minister, ta un bon comienso di e hornada nos dilanti. Ta di suma importancia cu e tematica di cambio climatico ser aborda door di tur sector di nos isla.

Minister Arends ta gradici tur cu tabata tey presente diasabra siman pasa pa nan input y compromiso. Aruba lo bira resiliente cu colaboracion di tur rubiano.



MENSAHE DI MINISTER XIOMARA MADURO DI FINANSA Y CULTURA NA OCASION DI DIA DI EMANCIPACION DI SCLAVITUD DEN REINO HULANDES

Un dia pa nos reflexiona riba e historia y su impacto te dia di awe



Awe dia 1 di juli 1863, Dia di Emancipacion di Sclavitud, nos ta recorda cu 161 aña pasa na aña 1863 Hulanda a aboli sclavitud legalmente den colonianan Antias Hulandes y Surnam.

Dia 19 di december 2023 na momento cu Premier Rutte a pidi disculpa pa e rol di Estado Hulandes den Sclavitud, nos Minister President Evelyn Wever-Croes a expresa; 'Een welgemeende excuus is altijd welkom,' un disculpa sincero ta semper bon bini. 'Ik houd U, de Nederlandse regering, aan de vandaag gedane belofte'. Mi ta tene Gobierno di Hulanda na e promesa haci awe.


Ora nos ta ofrece disculpa, nos ta pidi despena pa un eror cu nos no ta ripiti. Ta solamente ora nos reflexiona riba e eror haci, nos compronde di unda e ta bin y nos analisa nos comportacion, nos lo ta capaz di evita haci e mesun eror dia aden y dia afo.

Un disculpa mester ta sincero y esey ta exige reflexion profundo y aceptacion di nos tur den Reino Hulandes. Den e aña di conmeracion di 160 aña di Abolicion di Sclavitud den Reino Hulandes, como Minister di Finansa y Cultura nos a haci e peticion na Secretario di Estado Hulandes Van Huffelen, pa e reflexion aki tuma luga den Reino Hulandes, ya cu e manera cu den presente nos ta trata cu otro riba e yudansa duna den Reino Hulandes pa por surpasa e pandemia di COVID-19, no

ta cuadra cu e disculpa duna pa Premier Rutte. Di un banda bo no por pidi despena pa practica di maltrato duna den pasado, si den presente consciente of inconscientemente bo ta sigui cu e mesun practica.


E reflexion aki ta necesario tambe den e proceso di conmemoracion den Reino Hulandes, na unda Hulanda keto bay tin e regie den man y e islanan tin cu djies participa sin por dicidi pa nan mes con ta e miho forma pa recupera di e daño haci.

Awe dia 1 di juli ta un dia pa nos reflexiona riba e historia comparti di Sclavitud den Reino Hulandes y e impacto cu esaki tabatin y te ainda tin riba nos comportacion y trato pa cu otro den nos Reino Hulandes. Un disculpa sincero refleha den nos actonan, ta locual lo brinda consuelo berdadero y paz na tur cu no tey mas pa mira nan lagrimanan keda transforma den reconocimiento real di nan dignidad humano.



Minister **Xiomara Maduro** ta presenta un
Programa Informativo tocante:


Historia di 'Sclavitud cora' na Aruba




Den e programa aki sr. Luc Alofs, antropologo cultural y historiado lo comparti informacion tocante e **historia** di locual nos ta yama 'sclavitud cora', aunke no tabata un forma di sclavitud legal.

SINTONISA | 1 DI JULI 2024


Canal 13
5:30 PM



Canal 23
7:00 PM




Canal 48
8:30 PM



1 di juli 2024

Dia di Abolicion di Slavitud den Reino Hulandes

Un **disculpa sincero** refleha den nos actonan, ta locual lo brinda **consuelo** berdadero y **paz** na tur cu no tey mas pa mira nan lagrimanan keda transforma den reconocimiento real di nan **dignidad humano**.



Xiomara Maduro
Minister di Finansa y Cultura



| xiomaramaduro.com



TA INVITA PUEBLO DI ARUBA PA SINTONISA E SERIE DI PROGRAMANAN EDUCATIVO DI MANEHO DI IDIOMA



Manera ta conoci, entrante aña escolar 2024-2025, e alumnonan di klas 1 di scol basico lo siña lesa y skirbi na Papiamento. Lo duna Hulandes cu un acercamento nobo cu ta pas mas den e contexto di nos muchanan. E ta científicamente proba cu si e muchanan forma un base fuerte den nan propio idioma, nan por siña e otro idioma nan hopi mas facil y miho. Ademas, siña lesa y skirbi den idioma materno Papiamento lo haci cu e muchanan lo compronde loke nan ta skirbi y lesa y lo stimula nan habilidadnan di siña en general.

Esaki lo ta beneficioso pa e muchanan, mirando cu nan lo bira critico di pensamiento y lo ta mas prepara pa duna nan opinion durante les, den nan propio idioma. Tambe nan por conecta miho cu nan rais cultural. E muchanan lo sinti mas sigur den nan proceso di siñamento, pasobra esaki ta alinia cu nan idioma materno y nan cultura. Minister Endy Croes a subraya cu a tuma e decision aki ta di acuerdo cu e consehonan di e

rapportnan di expertonan cu ta domina e materia. E maneho di idioma ta basa riba recomendacion 2 di e rapport Doorlichting van het Arubaanse Onderwijsstelsel: elegi un maneho di idioma concreto y consecuente (maak een eenduidige en consequente keuze in het taalbeleid). E mandatario di Enseñansa a indica cu lo inicia cu e parti promocional di e campaña di Maneho di Idioma.

E trabounan cu a ser haci caba, awo ta preparando e parti promocional, unda cu a graba un serie di programa hunto cu e expertonan. Tambe lo bay den bario pa duna splicacion na e mayornan cu nan yiu ta bay klas 1. “Pues, nos ta sigur cu e lo bira un bunita proyecto y e frutanan nos lo mira den e añanan nos dilanti”, Minister Endy Croes a expresa. Pa finalisa, e mandatario di Enseñansa y Deporte ta invita Pueblo di Aruba pa sintonisa e serie di programa di Maneho di Idioma pa keda bon informa. ■■■

MINISTER ENDY CROES A PRESENCIA E BUNITA CONCIERTO DI LEERORKEST ARUBA

Gobierno di Aruba ta inverti 200 mil florin den e bunita proyecto aki

Diabierna mainta, Minister Endy Croes hunto Prome Minister Evelyn Wever – Croes a atende e concierto di Leerorkest cu a tuma luga na IMAX na Gloria. Sigur un momento historico, unda cu den forma di un Orkesta Nacional alrededor di 550 di 5 diferente scol basico a duna un bunita presentacion musical. E cinco (5) scolnan cu a participa ta Prinses Amalia Basisschool, Colegio Laura Wernet Paskel, ST. Paulus School, Graf von Zinzendorf Basisschool y Aruba Adventist Academy.

E alumnonan di klas 3, 4, 5 y 6 ta ricibi un bes pa siman les door di nos propio musiconan, unda cu nan ta siña toca diferente instrumento entre otro, violon, cello, trompet, trombón, dwarsfluit y clarinet. E muchanan a traha hopi duro durante henter e aña escolar pa por presenta dilanti un publico grandi den forma di un concierto. Durante e ceremonia di apertura, Minister Endy Croes, Prome Minister Evelyn Wever – Croes y Sr. Johnny Scharbaay a hiba palabra.

E mandatario di Enseñansa y Deporte a indica cu Gabinete Wever – Croes II a inverti 200 mil florin pa duna continuidad na e bunita proyecto aki. Por ultimo, Minister Endy Croes ta gradici coordinado di Leerorkest Aruba Sra. Juliette van Romondt y ekipo cu ta eherciando un bunita trabou. Tambe a gradici e musiconan pa siña e muchanan cu hopi amor y contribui den e desaroyo musical di Pais Aruba. Pa finalisa, e mandatario di Enseñansa y Deporte ta felicita e alumnonan cu nan magnifico presentacion.



MINISTER ENDY CROES A RICIBI SELECCION DI ARUBA CU A TITULA CAMPEON DI SERIE DI CARIBE 2024

Aruba ta representa Caribe den e campeonato Serie Mundial na South Carolina, Merca



Diadomingo atardi, Minister Endy Croes a ricibi Seleccion di Aruba U -16 na nan yegada na Aeropuerto Internacional Reina Beatrix. Manera ta conoci, Aruba Senior League Baseball a competi den e campeonato di Serie di Caribe cu a tuma luga na Mayagüez, Puerto Rico. Un total di seis (6) pais, esta Mayagüez Puerto Rico, Curaçao, Santo Domingo, Puerto Rico, Virgen Islands y Aruba a bataya pa conquista e titulo maximo. Cu e logro aki Seleccion di Aruba ta bay representa Caribe den e campeonato Serie Mundial di baseball cu ta tuma luga fin di luna di juli na South Carolina, Merca.

Den un esfera festivo yena di emocion y alegria mayor, amistad y amigo a ricibi nos campeonnan. Den nomber di Gobierno di Aruba, Minister Endy Croes a felicita nos seleccion y a haci entrega di e medaya di 4D. Pa finalisa, e mandatario di Deporte ta felicita e hobennan cu e gran logro aki, alabes ta gradici staf, coach, mayor y tur cu a haci e logro aki posibel. Cu deseo, disciplina, dedicacion y determinacion boso a logra. Aruba ta orguyoso di boso. Por ultimo, Minister Endy Croes ta desea nan hopi exito den Serie Mundial di baseball. ■

Minister Endy Croes:

CONSEHO DI MINISTER A RICIBI PRESENTACION DI CONSEHO NACIONAL DI RESILENCIA CLIMATICO

Diabierna 28 di juni, a tuma luga un reunion extraordinario di Consejo di Minister, unda cu e ministernan a ricibi presentacion di Sr. Ryan Peterson di NCRC y Simpson Institute cu ta trahando riba un “risk assessment” titula: CORVI (Climate and Ocean Risk Vulnerability Index). Durante e encuentro, a trata e cambionan climatico, esta “climate change” y “global warming” y su efectonan pa Aruba. Ta un echo cu Aruba su clima ta cambiando, por sinti entre otro, cu ta mas calor y cu e nivel di lama ta subiendo. Lo traha riba un plan nacional pa Aruba, unda cu lo tene cuenta cu e cambio climatico pa e proximo 20 pa 25 aña.

Tambe por a mira grafico con hopi e temperatura a subi mundialmente y kico ta e causa si e temperatura sigui subi. Esaki sigur lo por trece peliger cu ne si nos no ta bon prepara. En conexion cu esaki, e profesionalnan a duna un presentacion grafico y a presenta data di World Bank. Di e manera aki, lo guia Gobierno di Aruba y sector priva pa hunto prepara un plan di adaptacion y mitigacion di clima cu un vision pa largo plaso. Asina nos ta bon prepara y como pais nos por enfrenta e cambionan climatico. “E tabata un presentacion hopi interesante, tabatin hopi pregunta y nos lo sigui dialoga pa hunto crea un bunita plan pa Pais Aruba”, Minister Endy Croes a finalisa.



CU 12 VOTO NA FAVOR Y 9 CONTRA PARLAMENTO A APROBA PRESUPUESTO SUPLETORIO 2024

E aprobacion aki ta significa aumento di entrada pa trahadonan di sector publico y sector priva, pensioenadonan y esnan cu ta biba di e “gehandicaptenuitkering”

Diahuebs mainta, Parlamento di Aruba a continua cu e tratamento di Presupuesto Supletorio 2024. E reunion publico a inicia diamars mainta y a termina alrededor di 2:30 di marduga manece diaranson. Diahuebs, e ministernan tabata na turno pa den e segunda tanda pa contesta tur pregunta di e parlamentarionan. Minister Endy Croes a indica cu e ta lamenta cu e Fraccion di AVP y Gerlien Croes ta hunga politica di antaño, unda cu e ta acusa tur minister personalmente y ta critica, pero nan ta lubida di bin cu solucion. Ta musta nan e rapportnan di CAFT, IMF y Standard & Poors, unda tur rapport ta indica cu Aruba ta bayendo mucho miho, pero di esaki nan no ta papia.

“Nan no ta lansa ningun pregunta riba e “Voorjaarsnota”, pero si ta bin cu redashi bieu y mentira cu mi ta lamenta profundamente”, Minister Endy Croes a subraya. E ta kita hopi ora importante di parlamento pa haci politica den prensa pafo cu punto cu nan no tin rason. Na final di dia Parlamento di Aruba a aproba e Presupuesto Supletorio 2024 cu 12 voto na favor y 9 contra y asina a duna aprobacion pa e bon maneho



cu ta ser hiba na favor di Pueblo di Aruba. E aprobacion aki ta significa cu Gobierno di Aruba tin e mandato pa entre otro, haci e pago pa loke ta trata 11.7% di “indexering” pa e empleadonan publico, aumento di entrada pa e trahadonan di fundacion, aumento di pensioen y onderstand.



Reunion entre Gobierno di Aruba y Eagle LNG tabata positivo PRONTO LO INICIA CU E PROYECTO DI EAGLE LNG



Diabierna ultimo, a tuma luga un reunion entre Gobierno di Aruba y Eagle LNG. Minister di Energia Glenbert Croes ta sumamente contento cu e resultado di e reunion y a expresa esaki cu hopi felicidad anunciando cu e reunion a termina, na unda cu Gobierno hunto cu Eagle LNG a defini un "roadmap" pa cu continuacion di e proyecto.

Minister Croes a indica cu e proyecto aki ta un logro grandi pa pais Aruba, y ta inmensamente agradeci di tin no solamente e compromiso di Eagle LNG, sino tambe di Web Aruba NV y otro companianan estatal, cu ta dunando ful cooperacion pa cu realisacion di e proyecto aki.

E inversion cu Eagle LNG ta bay haci pa logra trece gas natural na Aruba pa wordo procesa y suministra, ta uno hopi grandi. Unabes logra esaki, e impacto riba e tarifa di awa y coriente lo ta uno significativo, di cual hunto cu proteccion di e medio ambiente ta un di e metanan principal di Gobierno. Obviamente, e deseo di Gobierno ta pa cuminsa lo mas pronto posibel, cu e proyecto, pero esaki lo wordo defini den e proximo simannan.

Vice Presidente di Eagle LN, señor Filipe Pinto tambe a expresa di ta sumamente satisfecho cu e resultado di e reunion, y cu nan ta "looking forward" pa pronto inicia cu e proyecto aki na Aruba.



MINISTER THIJSSEN A PONE KRANS NA CONMEMORACION NACIONAL DI E ABOLICION DI SLAVITUD 2024



Na Oosterpark Amsterdam a tuma lugar awe riba 1 di juli e conmemoracion nacional di e Abolicion di Slavitud dor di Hulanda na 1863 den e colonianan Surnam y Antianan Hulandes; e aña aki 161 aña pasa. Minister Plenipotenciario di Aruba mr. Ady Thijsen a pone un krans den nomber di Gobierno y pueblo di Aruba. E conmemoracion e aña aki ta marca e fin di e aña conmemorativo riba slavitud na Hulanda, e parti Caribense di Reino y Surnam.

Tradicionalmente un miembro di Gobierno di Hulanda ta tene un discurso y e aña aki a toca turno na Minister demisionario di Enseñansa Robbert Dijkgraaf. Tambe burgemeester di Amsterdam Femke Halsema y Linda Nooitmeer, presidente di NiNsee a tene un discurso.

Invitadonan special na e ocasion aki pa a hiba palabra tabata Kurano Bigiman den nomber di “Het Inheems Kennis Centrum Internacional” y Vito Charles, presidente di “The Committee for Emancipation and the Commemoration of the History of Slavery on Saba”.

E intermezzo musical a keda brinda pa Mara Leti cu entro otro a canta un tambu “Mi Lebertad” bou guia musical di Vernon Chatlein, Howard Zink, Cherry Bernadina y Amber Nijman.

Despues di e discursonan tabata tin 1 minuut di silencio sigui pa e parti di ponemento di krans na e “Slavernijmonument”. Banda di Minister Thijsen, tambe a pone un krans entre otro presidente di Eerste Kamer Jan Anthonie Bruijn, Minister Plenipotenciario Suplente di Curaçao Leonard Coffi, Minister Plenipotenciario Suplente di St. Maarten Gracita Arrindell, embahador di Surnam Rajendre Khargi y burgemeester di Amsterdam Femke Halsema. Di e Gabinete demisionario



a pone un krans Prome Minister Mark Rutte, Secretario di Estado pa Asuntonan di Reino Alexandra van Huffelen, Minister di Asuntonan Exterior Hanke Bruins Slot y Minister pa Rechtsbescherming Franc Weerwind.

NiNsee ta e instituto cu ta organisa e conmemoracion. E aña aki ta 22 aña cu NiNsee a keda funda y cu e conmemoracion a inicia cu desvelo na 2002 di e “Slavernijmonument” cu ta un obra di e escultor Erwin de Vries. ■



Gabinete Wever-Croes

Murayanan na San Nicolas, cu un tempo tawata silencioso y senciyo, a bira inspiracion pa creatividad dinamico di varios artista. Cada arte di muraya ta un celebracion di diversidad, cultura y union, dunando bida na murayanan y transforma nan den obranan maestro.

2024

AÑA DI STABILIDAD Y PROSPERIDAD